



## Президент Ислам Каримовнинг «Шаҳидлар хотираси» ёдгорлик мажмуининг очилишига бағишланган маросимда сўзлаган нутқи

Ассалому алайкум, азиз ва-тандошлар!

Қадрли меҳмонлар!

Хурматли оқсоқоллар!

Авваламбор, мана шу гўзал майдонда тўпланиб турган, узоқ-яқиндан келган, бугунги эзгу ишга дахлдор бўлган сиз азизларга, сизлар орқали бутун халқимизга чин қалбимдан ўзимнинг хурмат-эҳтиромимни изҳор этмоқчиман.

Хурматли жамоат!

Шаҳид кетган аждодларимиз хотирасига бағишланган, гоят қисқа муддатда қад ростлаган бу ёдгорлик мажмуини айнан шу жойда — кўп-кўп тарихий воқеаларга гувоҳ бўлган қадимий Бўзсув соҳилида барпо этганимиз бежиз эмас, албатта.

Одамларнинг юрагида муд-хиш из қолдирган қатағон йил-ларида бу кўримсиз жарлик — Алвасти кўприк деб совуқ ном олган, инсон қалбига кўрқув со-ладиган бу қаровсиз жойда халқимизнинг минглаб асл фар-зандлари отилган, бекафан, бежаноза, ном-нишонсиз кўмиб

ташланган.

Миллатимиз фахру ифтихо-ри бўлган Абдулла Қодирий, Абдурауф Фитрат, Абдулҳамид Чўлпон сингари юзлаб улуг зотларнинг ҳам шу ерда қатл этилганини яқингача кўпчилик билмас эди.

Зулм ва зўравонликка қурил-ган мустабид, бешафқат тузум даврида ўзлигини, миллат қадр-қимматини теран англа-ган, ижтимоий-сиёсий онги юксак, халқни уйғотишга, халқ-ни бошқаришга қодир бўлган, маърифат ва маънавият йўли-да фидойилик кўрсатган бар-ча ақл-заковат соҳибларининг жасадлари мана шу тепалик ва жарликларда ном-нишонсиз қолиб кетган.

Мана шулар қаторида сиё-сатдан мутлақо узоқ бўлган, минг-минглаб оддий деҳқон-лар, хунарманд-қосиблар, ишчи-хизматчиларнинг бегуноҳ қурбон бўлиб кетгани тасав-вурга ҳам сизгамайди аянчли бир ҳолдир.

Ана шу азиз аждодларимиз-

нинг арвоҳлари шунча йиллар давомида ҳаловат ва ором топ-масдан мана шундай кунларни кутар эди.

Биз уларнинг ушалмаган орзу-армонлари олдида, ора-дан шунча вақт ўтган бўлса-да, ҳали-ҳануз дил яраси битма-ган, кўз ёшлари тинмаган, ўша айрилиқнинг дарду ғами билан яшаб келаётган қавму қарин-дошлари, яқинлари, зурёдла-ри олдида, Яратганимиз олди-да бугун ўз инсоний бурчимиз-ни адо этмоқдамиз.

Азиз юртдошлар!

Жафокаш халқимиз асрлар давомида не-не оғир синов-лар, машаққатли кунларни кўрмади. Ўз озодлиги, эркин-лиги, тинч ҳаёти йўлида кура-шиб, беҳисоб қурбонлар бер-ган ота-боболаримиз жасора-ти тарихий хотирамиздан ҳеч қачон ўчмайди.

Айниқса, машъум 1937-1953 йилларда содир этилган бе-додликни тасаввур этиш учун

(Давоми 2-бетда)



### ШАҲИДЛАР ХОТИРАСИ — МАНГУ БАРҲАЁТ

Ўтган йили Президенти-миз Ислам Каримов ташаб-буси билан мамлакатимиз-да мустамлакачилик даври қурбонлари хотирасини абадийлаштириш ва «Шаҳид-лар хотираси» ёдгорлик маж-муини қуришга қарор қилин-ган эди. Шу қисқа вақтда бу борада улкан ишлар амалга оширилди. Жумладан, мил-лий мустақиллик, Ватан рав-нақи, юрт озодлиги учун жонини фидо айлаган эл ўғлонларининг қутлуғ хоти-расига пойтахтда муаззам хиёбон барпо этилди.

12 май, муборак жума тон-ги гўзал отди. Уфқдан бош кўтарган кўёш шу кун пой-тахтимиз марказидан оқиб ўтувчи Бўзсув соҳилида ажиб бир жонланишнинг гу-воҳи бўлди. Бир вақтлар киши ёлғиз юришга юраги бетламайдиган хилват гўша-ни бугун таниб бўлмайди. Буралиб оқаётган Бўзсувнинг икки соҳили кенг ва ям-яшил сайхонлик. Бунда яшил ли-бос кийган дарахтлар, шар-шара бўлиб қуйилаётган фавворалар, саккиз устун кўтариб турган нилий гум-

(Давоми 2-бетда)



Суратларда: маросимдан лавҳалар.

А. Тўраев (ЎЗА) олган суратлар.



## Президент Ислам Каримовнинг «Шаҳидлар хотираси» ёдгорлик мажмуининг очилишига бағишланган маросимда сўзлаган нутқи

(Боши 1-бетда)

Ўзбекистон бўйича қарийб 100 минг киши қатағонга учраб, 13 минг нафари отиб ташланганини эслаш кифоя.

Инсоний кадр-қиммати топталган, ҳаёти поймол этилган бу одамлар орасида юртимизда истиқомат қилган деярли барча миллат ва элатларнинг вакиллари бор эди.

Шу даврда қанча-қанча одамларнинг ўз оиласидан жудо бўлгани, аёллар беваликка, гўдаклар етимликка маҳкум этилганини инобатга олсак, халқимиз бошига тушган бу фожиянинг миқёси янада яққол намоён бўлади.

Барчамизнинг тақдиримизга дахлдор бўлган тарихий адолатни тиклаш, халқимиз ва миллатимизнинг яқин ўтмишидаги ҳали-ҳануз сир бўлиб келаётган ёпиқ саҳифаларни тўла очиб бериш, шу тарихдан сабоқ чиқариб бугунги ва келажак ҳаётимизга онгли қарашни шакллантиришда мана шу ёдгорлик ва амалга ошираётган эзгу ишларимизнинг алоҳида ўрин тутиши шубҳасиз.

Аслида биз қўлга киритган мустақилликнинг моҳияти ҳам ўзлгимизни англаб, ўз тақдиримизни ўз қўлимизга олиб, миллатимизнинг кадр-қимматини, унинг шаъни ва ғурурини тиклаб, асрий адолатни қарор топтириш ва халқимизнинг обрў-эҳтиборини янада юксалтириш демакдир.

Бугун ана шу олижаноб мақсад йўлида яна бир кутлуғ қадам қўйилди.

Биз бугун шу табаррук зиёратгоҳда туриб, овоз ва эркин Ватан учун жон берган шаҳидлар руҳи олдида бош эгиб, уларга ўз ҳурмат-эҳтиромимизни баҳо этамиз.

Бу зиёратгоҳни биз қатағон қурбони бўлган, жисми олис-олисларда қолиб кетган Маҳмудхўжа Бехбудий, Мунаввар қори, Усмон Носир, Убайдулла Хўжаев, Саид Аҳрорий, Боту, Исҳоқон Ибрарат, Элбек сингари юзлаб юртдошларимизнинг ҳам рамзий мозори сифатида қабул қилмоғимиз керак, деб ўйлайман.

Мана шу жойдаги минглаб инсонларнинг шу кунгача чирқираб ётган руҳи поклари бугун барчамиздан, эзгу ишларимиздан рози бўлиб, шояд ором топган бўлса, ажаб эмас.

Қатағон йилларида қурбон бўлган ота-боболаримиз хотираси олдида ўз инсоний бурчимизни баҳо келтириб, шу муборак жума тонгида қилган барча дуои фотиҳаларимиз илоё ижобат бўлсин.

Бугунги маросимда узок-яқиндан келган ҳамюртларимиз ва меҳмонларимиз орасида Ватанимиз озодлиги, беғубор ҳаётимиз, авлодлар бахт-саодати йўлида қурбон бўлган инсонларнинг қариндош-уруғлари, ёру биродарлари иштирок этаётгани тарихимизда адолатнинг яна бир саҳифаси тикланаётганидан далолатдир.

Биз буни ўша қатағон йилларида эзилган, кадр топмаган қанча-қанча одамлар орзиқиб кутган кутлуғ кунларнинг тантанаси, деб қабул қилмоғимиз даркор.

Азиз дўстларим, биродарларим!

Шу қурилиш давомида

ўтганлар руҳини ёд этиб, минглаб юртдошларимиз, мухтарам нурунийларимиз, зиёлиларимиз, адабиёт ва санъат аҳли, турли касб эгалари ҳашарлар уюштириб, беғараз меҳнат қилгани — алоҳида эътибор ва таҳсинга сазовор.

Мана шундай бебаҳо ва буюк инсоний фазилатларга эга бўлган, барча хайрли ишларга доимо тайёр, қалбида меҳр-оқибат туйғуси ҳеч қачон сўнмайдиган, озодлик йўлида жон берган фарзандларининг табаррук номларини ўз хотирасида ҳамиша сақлаб келаётган, бағрикенг, виждони уйғоқ халқимиз асло кам бўлмайди, иншоолло.

Мухтарам юртдошлар!

Бугунги унутилмас, савобли ва тарихий бир воқеанинг асосий иштирокчилари бўлмиш мана шу ёдгорлик мажмуини бунёд этган моҳир қурувчилар ва қўли гул усталарга, меъмор-муҳандисларга чин қалбимдан ташаккур билдираман.

Гўзал бог-роғлар яратиб, бу жойни обод қилишда қатнашган қадимий Юнусобод аҳлига, барча ҳамшахарларимизга таъзим қиламан.

Шу улуғ ва беғараз ишларга ҳисса қўшган қўлларингиз дард кўрмасин, бошингиз омон бўлсин!

Азиз ватандошларим, мухтарам юртдошларим!

Шу лаҳзаларда ҳаммамизнинг кўнглимиздан кечаётган бир туйғуни ифода қилиб айтмоқчиман: шаҳидларнинг руҳи шод, охиратлари обод бўлсин.

Юртимиз тинч, осмонимиз мусаффо, озодлик ва истиқлолимиз абадий бўлсин!

## ШАҲИДЛАР ХОТИРАСИ — МАНГУ БАРҲАЁТ

(Боши 1-бетда)

баз, текис ва бежирим йўлқалар кишининг кўнглига ҳам фарах, ҳам сокинлик кайфиятини солади...

Ёдгорлик мажмуининг очилиш маросимида Қорақалпоғистон Республикаси, вилоятлар, давлат ва жамоат ташкилотлари, пойтахт жамоатчилиги вакиллари ташриф буюрган.

Ун етти гектарлик кенг хиёбон узра шаҳидлар хотирасига бағишлаб ўқилган «Қуръон» оятлари янграйди. Сўнг анъанага мувофиқ, йиғилганларга наҳорги ош тортилди.

Ёдгорлик пойида ўтказилган хотирлаш маросимида мамлакатимиз Президенти Ислам Каримов нутқ сўзлади.

— Шаҳид кетган аждодларимиз хотирасига бағишланган, ғоят қисқа муддатда қад ростлаган бу ёдгорлик мажмуини айнан шу жойда — кўплаб тарихий воқеаларга гувоҳ бўлган қадимий Бўзсув соҳилида барпо этганимиз беҳиз эмас, — деди юртбошимиз. — Зулу ва зўравонликка қурилган мустабид, бешафқат тузум даврида ўзлгини, миллат кадр-қиммати-ни теран англаган, ижтимоий-сиёсий онги юксак, халқни уйғотишга ва бошқаришга қодир бўлган, маърифат ва маънавият йўлида фидойилик кўрсатган кўплаб ақл-заковат соҳибларининг жасадлари мана шу тепалик ва жарликларда ном-нишонсиз қолиб кетган.

Биз уларнинг ушалмаган орзу-армонлари олдида, орадан шунча вақт ўтган бўлса-да, ҳали-ҳануз дил яраси битмаган, кўз ёшлари тинмаган, ўша айрилиқнинг дарду ғами билан яшаб келаётган қавму қариндошлари, яқинлари, зурёдлари олдида, Яратганимиз олдида бугун ўз инсоний бурчимизни адо этмоқдамиз.

«Шаҳидлар хотираси» хайрия жамғармаси раиси Наим Каримовга сўз берилди. Бундан тўққиз йил илгари, ватанимиз истиқлолдан аввал, шаҳидлар хотирасини шунчалик эъозлаш мумкинлигини, ҳатто тасаввур ҳам қилиш қийин эди, деди у. Лекин Ватан мустақиллиги учун курашганлар, эрк истаганларнинг умиди ўлмаслигини кўрсатди. Қатағонга учраганлардан бири қўлида кишан билан сўнгги йўлга кетаётган, ҳомиладор хотинига қарата, қиз кўрсанг, исмини Умида, ўғил туғилса, Нажот қўйгин деган экан. Бугунги маросим аслида ўша умид қилинган НАЖОТнинг етиб келганини исботлаб турибди.

Қатағон қурбонлари фақат зиёлиларгина бўлмаган, истибдоднинг оловида ҳўлу қуруқ баравар ёнган. Хужжат-

ларнинг гувоҳлик беришича, ўттизинчи йилларнинг ўрталарида бир туман миқёсидаги раҳбар қамалгач, унинг «думи» сифатида яна эллик саккиз киши бадарға этилган экан. 130 йиллик мустақиллик даврида эса Ватаннинг қанчалаб асл ўғлонлари эрк орзусига етолмай тупроққа бош қўйганини бугун аниқ айтиш қийин. Лекин улуғ шоиримиз Чўлпон ёзганидай: «Йўқ, ўлим йўқ, Бир ўчиб сўниш, яна ёниш бор!» Ватан ва халқ бахт-саодати йўлида шаҳид кетган аждодларимиз учун ўлим йўқ.

Маросимда қатағон қурбонларининг авлодлари, яқин қариндошлари — Холлида Аҳророва, Мутал Бурхонов, Рафиқа Абдуганиева, Назира Қодирова, Эгамназар Қодиров сўз олиб, қатағон даҳшатларидан, шаҳидларнинг оила аъзолари чеккан жабр-зулмдан гапирдилар. Ўша мудҳиш кунларнинг қайтмас бўлиб кетиши ва шаҳидлар табаррук номларининг тикланиши борасида улкан ишларни амалга ошираётган Президент Ислам Каримовга миннатдорлик туйғуларини изҳор қилдилар. Ана шундай хайрли ишлардан бири бўлган мазкур муаззам бог эса шаҳидларнинг хотирасига қўйилган муносиб ёдгорлик эканини таъкидладилар.


Маросим яқунлангач, Президент Ислам Каримов оммавий ахборот воситалари вакиллари билан мулоқотда бўлди. Юртбошимиз, бугунги авлодлар ватан ва халқ бахт-саодати йўлида қурбон бўлган аждодларимиз олдида қарздор эканини таъкидлади. Бугун очилган «Шаҳидлар хотираси» ёдгорлик мажмуи ана шундай қарзни узиш йўлидаги бир қадамдир. Айна пайтда бу ёдгорликни ҳақиқат ва адолат тантанаси сифатида ҳам тикладик, деди мамлакатимиз раҳбари. Чунки адолат ва ҳақиқат барибир рўёбга чиқади. Адолат ва ҳақиқат бўлмаган жойда эса демократия ҳам бўлмайди, инсон ҳуқуқларини таъминлашнинг ҳам иложи йўқ. Ана шундай буюк мақсадларни ўз фаолиятига шиор қилиб олган бобомиз Амир Темур улкан ва шавкатли давлат қуриш йўлида қанчадан-қанча мушкулотларни бошидан кечирган, қамоқларда азоб чеккан, саҳроларда дарбадар кезган. Лекин у ўз мақсади йўлида собит бўлгани учун ҳам охир-оқибатда ниятига эришган. Ўша сабот-матонат халқимизга меросдир. Шу сабот буюк келажакимизнинг гавовидир.

«Шаҳидлар хотираси» ёдгорлик мажмуи илк кундан-қўзиёратчилар билан гавжум бўлди.

Мусулмон НАМОЗ,  
ЎЗА МУХБИРИ







## ДУНЁНИ МЕХҲР-ОҚИБАТ ҲАМ ҚУТҚАРАДИ

Шу йилнинг 10-12 май кунлари Тошкент шаҳрида "Таълим тўғрисида"ги Қонун ва "Кадрлар тайёрлаш миллий дастури" ҳамда «Соғлом авлод Давлат дастури — амалда» мавзусида ўтказилган "Йил ўқитувчиси — 2000" республика кўрик-танлови ус-тозлик салоҳиятини янада юқори по-ғонага кўтаришда, муаллимлар бир-бирлари билан тажриба алмашишларида муҳим, ўзига хос баҳс, мусобақа майдони вазифасини ўтади, десак муболага бўлмас. Баҳсни ҳакамлар ҳайъати аъзолари холисона баҳолаб бордилар.

Танловнинг илк куни республика кўрик-танлови иштирокчилари РТМда ҳакамлар ҳайъати ва эксперт комиссияси аъзолари билан учрашиб, суҳбатдан ўтишди. Уларнинг педагогик инновациялардан нечоғлик хабардорлиги, компьютер саводхонлиги ҳам синовдан ўтказилди. Шу

аснода иштирокчиларнинг видеодарслари таҳлил қилинди, тест саволларига жавоблари тингланди.

Шу куни иштирокчилар Хотира майдонини ҳам зиёрат қилдилар. Амир Темур, Алишер Навоий ҳайкаллари пойига гуллар қўйишиб, Темурийлар тарихи Давлат музейи билан танишишди.

Биз кўрик-танлов иштирокчилари билан бирга юрганимизда шу нарса-ни пайқадикки, улар ҳар қандай воқе-ликни эътиборсиз қолдиришмас экан. Масалан, бу фидойилар майдон ва му-зейлардаги ҳар бир бўлимни диққат билан кузатиб, ҳатто айрим саналар-ни ён дафтарларига қайд қилиб қўй-шар эдилар...

Хаёлимизни эса "Бундай зукко ўқитувчиларнинг дарслари қандай бўлар экан?" деган саволлар тарк эт-масди. Очiq дарслар жараёнида му-аллимлар ўқувчиларни мустақил фик-рлашга ўргатиш усулларини, ноанъа-

навий дарсларни, ижодкорликларини тўла-тўқис намоён қила олдилар. Улар вазиятлардан чиқа билиш ма-ҳоратларини ҳам ёрқинроқ кўрсати-шиб, ўғил-қизларни фаолликка унда-дилар. Муҳими, иштирокчилар ҳар бир машғулот мавзусини мустақил-ликка, истиқолнинг қадрига етиш ту-шунчаларига, кадриятларимизга боғ-лаб ўтишди. Деярли ҳар бир дарсда бошқотирма ва тестлардан, топишмоқ ва сахна кўринишларидан фойдала-нилди. Аксарият дарсларда эса ўқув-чилар гуруҳларга бўлиниб, баҳс-му-нозараларга киришишди.

Дунёни гўзаллик қутқаради, дейи-шади. Чунончи, бу йилги танлов иш-тирокчиларининг миллат, Ватан, гурур, иймон, эътиқод, кадрият тушунчала-ри акс этган гўзал, ноанъанавий дарсларини пойтахтнинг 110-мактаб

ўқувчилари ўзгача завқ билан қабул қилишди. Таъ-

кидлаш жоизки, иштирокчилар бир соатлик дарс жараёнида ўғил-қиз-ларга бутун меҳрини бағишлаб, ма-ҳорат билан сабоқ беришди. Шу бо-исданми, ўқувчилар иштирокчилар-нинг ҳар бир саволига жавоб бериш ҳаракатида бўлдилар.

Хуллас, "Йил ўқитувчиси — 2000" кўрик-танлови қатнашчилари ажиб бир ҳақиқатни кашф қилишди: "Ду-нёни нафақат гўзаллик, балки меҳр-оқибат ҳам қутқаради".

("Йил ўқитувчиси — 2000" респуб-лика кўрик-танловининг якунига ба-ғишланган таҳлилий мақола билан газетамизнинг навбатдаги сонлари-дан бирида батафсил танишасиз).

Курбонбой  
МАТҚУРБОНОВ

Суратларда: кўрик-танлов иш-тирокчиларининг Тошкент шаҳри-даги 110-мактабда ўтказган очiq дарсларидан лавҳалар акс этган.

Равиль АЛЪБЕКОВ олган суратлар

## “УМИД” ЎЗБЕКИСТОНГА ҚАЙТДИ

Яқинда "Умид" совриндорларидан 80 нафари чет эл олий ўқув юртлари-да таълим олиб қайтишди.

Бакалавр даражасини олиб келган-ларга Ўзбекистон олий ўқув юртлари-да билимларини чуқурлаштириш учун тавсиялар берилди. Магистрликни эгаллаганлар эса аспирантурада ўқиш-лари мумкин. Ёки бу билимни улар ўз ука-сингилларига берадилар, Ўзбе-кистон тараққиётига сарфлайдилар. Зеро, етук мутахассис жамиятдан ўз ўрнини топиб олиши, шубҳасиз.

МУХБИРИМИЗ

## БИР ПИЁЛА ЧОЙ УСТИДА

Талабалик даври олтин даврдир. Фарғона вилояти, Фарғона тумани ҳокимлигида бўлиб ўтган тадбир, тала-балар ҳаётидаги унутилмас кун бўлиб қолди. Президентимиз раҳнамоликла-рида иқтидорли ёшларга билдирилаёт-ган ишонч, кўрсатилаётган эътибор бизнинг туманда ҳам ўз ифодасини топмоқда. Туман ҳокими Тўлқинжон Эгамбердиев маҳаллий ҳудуддан чиқ-қан, ҳозирда республикаимизнинг тур-ли олий ўқув юртларида таҳсил олаёт-ган талабаларнинг энг иқтидорлилари билан бир пиёла чай устида гурунглаш-ди. Бу учрашувга нафақат талабалар, балки туманимиз фаоллари, олий ўқув юртларида таълим бераётган мўътабар устозлар ва ота-оналар ҳам таклиф этилган эди.

Хурмат-эътибордаги Андижон Дав-лат тиббиёт институти даволаш фа-культетининг 3-курс талабаси Эльбек Ғуломов, Фарғона Давлат университе-ти методика факультетети 4-курс та-лабаси, Навоий номидаги стипендия соҳибаси Мафтунахон Обидовалар Фа-рғона туманининг фахридир.

Эльнора ҒУЛОМОВА,  
Фарғона Давлат университети,  
ўзбек филологияси факультети  
2-курс талабаси

## ПСИХОЛОГЛАР НИЗОМИ МУҲОКАМАДА

Ўзбекистон Республикаси Халқ таъ-лими вазирлиги, РТМ, республика Ташхис маркази, Бухоро вилоят халқ таълими бошқармаси ҳамкорлигида мактаблардаги амалиётчи психолог-ларнинг вазифаларига бағишланган республика амалий семинари бўлиб ўтди.

Ҳилола КОШКАРОВА

## ИЛМГА ИНТИЛГАН ЭЛ

Пойтахтимиздаги Миср Араб Республикасининг фан ва таълим маркази фаолият кўрсатаётганига кўп бўлгани йўқ. Марказда ёши ва касбидан қатъ-ий назар илмга чанқоқ бўлган инсонлар таҳсил олмақдаслар. Айни кунларда бу ерда мингга яқин илм толиблари олий маълумотли устозлар кўлига араб тили ва грамматикасини пухта ўрганмоқдалар.

Куни кеча навбатдаги битирувчилар шаходатнома олиш ва устозлар би-лан хайрлашиш учун бу ерга йиғилдилар.

Миср Араб Республикасининг Тошкентдаги элчиси Мамдуҳ Шавқий жаноб-лари талабаларни айём билан қутлаб, шундай гедди:

— Ўзбек ёшлари илмга жуда чанқоқ ёшлар. Бунинг мен ўзимнинг кузатувимга асослашиб айтияпман. Аммо илмга ҳам ғоя бор. Биз фарзандларимизни инсон-парварлик ва тараққиёт ғоялари мужассамланган илм йўлига солишимиз ке-рак. Ана ўшанда залолат ва қабоҳат барҳам топади. Ўзбек халқининг илмга бўлган интилишларини эътиборга олиб, биз Бухорода ҳам худди ана шундай таълим маркази очишни режалаштирганмиз.

Талабалар ижро этган куй ва қўшиқлар, театр томошалари иштирокчи-ларга катта таассурот қолдирди.

Каноат БОЙХОН қизи











## ИЗҲОР ЭТИЛГАН ХАЙРАТЛАР

Ўзбек тўйни яхши кўради.

Халқимизнинг йигин-маросимлари, анжуманлари ҳам тўйдайд ўтади. Паркент туманида уюштирилган ижодкор ўқитувчиларнинг навбатдаги тўққизинчи анъанавий анжумани ҳам шундай кўтаринки кайфиятда бўлиб ўтди. Унда иштирок этган ҳар бир ўқитувчи ўзини кўрсатишга, иқтидорини намойиш этишга муаллимларга хос синчковлик ва ўзбекларга хос андишалилик билан ҳаракат қилишди.

Анжуман иштирокчилари ва меҳмонлари Ҳисорақдаги Ўзбекистон Фанлар Академияси "Физика-Кўёш" илмий-ишлаб чиқариш бирлашмасининг материалшунослик институти жойлашган сўлим масканга етиб келдилар. Анжуман бошланиши олдида мазкур институтнинг лаборатория мудирини Ра-сулжон Акбаров кўёш нурини йиғувчи ойналар мажмуи томошасида уларнинг вазифаси, институтда амалга оширилаётган ишлар ҳақида сўзлаб берди.

Ушбу бирлашма мажлислар залида бўлиб ўтган анжуманнинг очилиш маросимида Ўзбекистон Республикаси Халқ таълими вазири Жўра Йўлдошев анжуман иштирокчиларини қутлаб, адабиётнинг ҳаётдаги, мактабдаги, болалар тарбиясидаги ўрни ҳақида сўзлар экан, жумладан, шундай деди:

— Ижодкорлик — мактабнинг, таълимнинг ўнгланишида ҳаракатлантирувчи куч. Куш уясида кўрганини қилади. Мактаб ҳам иккинчи уя. Ижодкор ўқитувчининг шахс орқали шахсни тарбиялаш, муаллим обрўсини кўтаришда ўрни бекиёс.

Ўзбекистон Ёзувчилар уюшмаси раисининг биринчи ўринбосари, шоир Йўлдош Сулаймон адабиётсеварларнинг сафи янада кенгайиши тилагини билдириб, ўқитувчи-ижодкорларнинг бир қанчаси ёзувчилар

уюшмасига қабул қилинганларини, бу албатта, жиддий иш эканлигини айтди.

Шундан сўнг шўьбаларга бўлинган ҳолда мушоира, мунозаралар давом этди. Шоирлар Икром Отамурод, Рустам Мукулмон, Сафар Барноев шеър ёзувчи муаллимлар, ёзувчи Нодир Норматов насрий машқлар, шоир Паймон тожик тилида ижод қилувчилар, шоир ва таржимон Музаффар Аҳмад туркман, қозок ва қорақалпоқ тилида ижод қилувчилар билан иш олиб бордилар.

Энг қизгин давра анжуман қатнашчиларининг саксон фоизини ўзида жамлаган шеърят шўьбаси давраси бўлди.

Ижодкорга аудитория керак. Топган хайратларини изҳор этиш давомли завқ бағишлайди. Муаллимлар ушбу даврада кўплаб шеърлар ўқидилар.

Мамараҳим Кўчқоров, Манзура Тўраева, Жамшид Ҳақберди, Бегали Мўминов шеърлари қисқа ва лўнда, пишган сатрлари билан ажралиб турди. Буни табиий усул — қарсақлар билан баҳолаш ҳам кўрсатиб берди.

"Кумушкон" дам олиш зонасида бўлиб ўтган анжуманнинг якунловчи қисмида ижодкор муаллимлар бир пиёла чой устида мушоираларни давом эттирдилар. Халқ таълими вазирининг биринчи ўринбосари Йўлдош Саиджонов анжуман қатнашчиларига ижодий муваффақиятлар тилаб, уларга халқ таълими вазирининг ташаккурномалари ҳамда эс-далиқ совғаларини топширди.

Бу ерга гўзалликни, адабиётни, шеърни сеувчилар ташриф буюргани қайтишда ҳам билинди. Автобустаги ўзига хос завқ бахш этувчи мушоира Тошкентга етиб келгунча тўхтамади ва у ўқитувчилар билан бирга бутун республикамизга тарқаб кетди.

Куйида ижодкор ўқитувчилар анжуманида ўқилган шеърлардан намуналар берилмоқда.



## ПУШКАРЧУГА ҚУРАР ШЕЪРИЯТ...

Дўстлар, мен Пушкиннинг ёшига етдим,  
Кўп қоғоз-қаламнинг бошига етдим.  
Кўнглимда шоирлик энг эзгу ният,  
Тушларимга кириб чиқар шеърят...



Бодом гулламоқда — ойдин бир хаёл,  
Табиат гўёки бокира аёл.  
Ҳаётимнинг ўттиз етти баҳори,  
Севгимдан куй чалар қалбимнинг тори.

Мен бағримни очдим — кўм-кўк тоғларга,  
Зумрад водийларга, сўлим боғларга.  
Пушкиндек ҳайқариб шеър айтдим буткул,  
Баҳор... шоир, дея тутди алвон гул.

Сойнинг сувларида аксимни кўрдим,  
Сочимда оқ кўриб узоқ ўй сурдим.  
Гўзал туйғулардан ариганим йўқ,  
Жўралар, мен ҳали қариганим йўқ!

Шеромад ИСЛОМОВ,  
Навбахор туманидаги 13-мактаб ўқитувчиси

## БАЛИҚЧИ ЛОФЛАРИ

### ШАМОЛ

— Кеча шундай шамол келдики, беш йиллик, олти йиллик теракларни учуриб юборди. Минг йиллик чинорлар кўпорилиб тушди, — деди қатортутлик лофчи.

— Сизлар томонда шамол бўлмабди, — деди бозорбошилиқ лофчи. — Мен далада трактор ҳайдаётгандим. Бирдан шамол турди, тракторни ташлаб уйга келдим. Қарасам, шамол мендан олдин тракторни учуриб уйга ташлаб кетибди.

### ДУМБА ЁҒИ

— Хотиним бугун меҳмонга қўй ёғидан ош қилган эди, — деди бозорбошилиқ лофчи. — Бизга қўй ёғи деҳқончиликда гап. Ҳисори қўйим бор. Маккажўхориға боқаман, думбаси ёрилиб кетган. Шунга идиш қўйиб қўйганман. Кунига 3-4 кг думба ёғи оламан.

Шунда қатортутлик лофчи деди:  
— Менда ҳам сиз айтгандай беш-олти кўзи бор. Катта кўчқоримнинг ёғи ариқда оқиб ётибди...

Абдуғаффор ҚОСИМОВ,  
Балиқчи туманидаги 50-мактаб ўқитувчиси.

Саҳифани Хусан КАРВОНЛИ тайёрлади.

## СОЧИНИ СИЛАСАМ СУКУТНИНГ

### КУТИШ

Кутдим,  
Кўзларимга кўмилиб кутдим.  
Қарогимга юлдузлар чўкиб,  
Минг оҳ ютиб, минг гуноҳ тўкиб,  
Кутдим. Кутавердим жим...



Ёлғизлик чархидан эланиб,  
Зардоб — кўз ёшимга беланиб,  
Хазонрез севгимга тиланиб,  
Кутдим. Кута олдим, бас.  
Оғусоз бир оғу олиб кел,  
Кутмоқлик жомига солиб кел,  
Эй сабр, голиб кел, голиб кел,  
Мен кутиб ўтайин дунёдан.

Кутдим. Кутавердим. Кута олдим, бас!  
Юракка қийноқни қон қилиб кутдим,  
Изсиз йўлларингга жон илиб кутдим,  
Барибир келмасдинг, мен билиб кутдим.  
Кутдим. Кутавердим. Кута олдим, бас...

Кутдим, сирларимни сиқиб қуритдим,  
Ғамбода тунларнинг кўлидан тутдим,  
Сарғайган сабрлар, қаҳрлар ютдим,  
Кутдим. Кутавердим. Кута олдим бас.

Қалбимни поёндоз қилиб йўлингга,  
Бевафо дунёни айладим абас.

Бегали МўМИНОВ,  
Шахрихон шаҳридаги  
10-мактаб ўқитувчиси

Кўнгил боғчасида ардоқланган гул,  
Наҳотки сўлиди,  
Наҳотки хазон?!  
Дилнинг дили Сизни қўмсаган чоғда,  
Қайларда юрибсиз, кўзлардин ниҳон?!

Кўнгил боғчасида авайланган гул,  
Наҳотки сўлиди, наҳотки хазон...  
Қишининг аёзлари кучса ҳам мени  
Сизнинг ҳаёлингиз иситар ҳамон!

Башорат БУЗРУКОВА,  
Чироқчи туманидаги 54-мактаб ўқитувчиси

Бутун борлиқ тилсимларини,  
Англамоққа ошиқар юрак.  
Нега мунча маънос мажнунтол,  
Нега мунча титрайди терак?

Саволлардир — чексиз коинот,  
Тилсимларга кўмилган ҳаёт.

Нажот истар гўё одамзод,  
Халоскори ёлғиз муҳаббат!

Ҳар нарсага қўйсанг эътиқод,  
Кўринади жозибалари.  
Ҳатто ғамдан топарсан лаззат,  
Муҳаббат-ла гўзалдир бари...

Неъмат КАТТАБЕК,  
Зарбдор туманидаги 19-мактаб ўқитувчиси

### АТИРГУЛ

Атиргул, пойингга тўқилган  
Соғинчлар япроқдек сўлмайди.  
Тақдирнинг ҳукми ҳам ўқилган,  
Мен сени севмасам бўлмайди.

Ҳасратлар чекмасам бир дунё,  
Ўксиниб ўтмасам ҳисобмас.  
Азоблар тиг тортиб бўйинимга  
Жонимга қилсалар суиқасд.

Ёнимдан жилмаса ёлғизлик,  
Сочини силасам сукутнинг.  
Гўзаллар келсалар қошимга,  
Десалар, сиз бизни унутинг.

Унутсам, йигласам ичиқиб,  
Атиргул, бир сендан кечмасам.  
Бир лаҳза яшашим даргумон  
Лабингдан гулоблар ичмасам.

Фалакни тўлдирса изтироб,  
Юракда битта ишқ қолса тул.  
Тақдирнинг ёзиғи шу... фақат,  
Сен севиб қўймагин, Атиргул,  
Сен севиб қўймагин, Атиргул.

Жамшид ҲАҚБЕРДИ,  
Китоб туманидаги 44-мактаб ўқитувчиси

### ЎҒЛИМГА

Ўтаверсин сенинг ёнингдан  
Бу дунёнинг жами ҳилқати.  
Менинг ёлғиз мўъжизам ўзинг,  
Сен умримнинг чин саодати.

Эркалинг бошим устига,  
Жоним садқа табассумингга.  
Подшоҳсан — амринг мустажоб,  
Тиз чўқади дунё пойингга.

Соҳиба НУРИДДИНОВА,  
Учкўприк туманидаги 1-махсус мактаб-интернат ўқитувчиси













